



Uunga siunnersuut: Siusinaartumik pensionisiat pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq. (Kalaallit Nunaanni, Danmarkimi Savalimmiunilu kommunit akornanni paasissutissanik paarlaasseqatigiittarneq, nuunnermi siusinaartumik pensionisianik qaammatini 12-*ini attassiinnarnissaq, ingerlaannartumik qaffasinnerpaanik siusinaartumik pensionisianik pisartagaqalersitsineq*)

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)
(Siullermeerneqarnera)

Demokraatit isumaqarput naalagaaffeqatigiinnerup iluani inuiaqatigiinni inatsisitigut inissisimaneq naligiittoqarnissaa inissaminiittoq. Matumuuna inuit sioqqutsillutik pensionisiallit nunat akornanni nuunnermi ulluinnarni inuuniarnermi aningaasaqarnikkut ajortumut inissinnginissaat siunnersuummi anguniarneqarmat nersuareqaarput.

Tusarniaanermi akissutini maluginiarparput tusarniaanermi aperineqarsimasut arlallit kommuunip aningaasaqarnera inuttamik kommuunimut allamut nuunnermi siusinaarlutik pensionisiatik qaammatit 12-*ini tigusartagaqalersinnaaner*at tupigusuutigalugulu ernumassutigigaa. Siusinaartumik pensionisiat pillugit Inatsisartut inatsisaani §7 b, imm. 4-mi allaqqavoq, § 33-mi, imm. 1 *naapertorlugu siusinaartumik pensionisianik pisartagalik kommunimi nuuffigineqartumi siusinaartumik pensionisianik pisartagaqalernissaminik akuerineqaruni Kalaallit Nunaanni kommunimut qimanneqartumut nalunaaruteqarnissaminut pisussaaffeqarpoq*, malinneqarneratigut kommuunit aningaasaqarnerat isumannaarneqassasoq tassami kommuuni nuuffigineqartoq nuuttoq aningaasartuutigilissammagu.

Tusarniaanermi akissutit ilaat siusinaartumik pensionisialinnut tunngasoq taperserlugu Demokraatinit erseqqissarusupparput kommuuni nuuffigineqartoq naliliisussaataammat nutaamik sulisinnaanernermik naliliisoqassanersoq tassami inunnik isumaginnittut misilittagaqarfigimmassuk siusinaarlutik pensionisiat najugaqarfinni ataasiakkaani atugassaritisaasut malillugit assigiinngitsumik suliarineqartarmata. Unammilligassaq manna oqaatigissavarput inatsisinik nalilersuisinnaanernermik malinnissinnaanermillu tunngaveqartariaqarmat, inoqarfinnilu ataasiakkaani kommuunit suliasaasariaqarluni. Tamatumuuna inatsit assigiimmik atorneqaqqullugu inatsimmut allannguutissatut siunnersuummi ilitsersuummik inatsisip qanoq atorneqarnissaanut tikkuussisumik peqartoqartariaqarneranut kissateqartoqarmat isumaqataalluta tapersiivugut. Aammattaaq sammisani ataasiakkaani qarasaasiami illersuutit qanoq pisariaqartiginersut erseqqissarusupparput, aammattaaq nunat akornanni paasissutissanik paarlaateqatigiinnermi akuersissutininik peqqaartarnissap isumannaajarnissaa pisariaqarmat.



TILIOQ - Inuit innarluutillit illersuisoqarfiata oqariartuutigivaa inuit innarluutillit pisinnaatitaaffii pillugit inatsisitigut inissisimaneq inuillu innarluutillit pillugit isumaqatigiissutip immikkoortortaa sulit tamakkiisumik malingikkivut.

Demokraatini maluginiarparput siusinaartumik pensionisiat pillugit inatsit nalinginnaasumik tunngaviatigut allanngortinneqartariaqarmat, tusarniaanermi akissutit assigalugit inuit innarluutillit pillugit isumaqatigiissutip anguniangai, siusinaartumillu pensionisanik pisartagaqarnermi akuersisarnerit malillugit iluarsaanneqassammat. Tusarniaanermi akissutit tunngavigalugit suliniutinut pingasuusunut Kalaallit Nunaanniik, Danmark-imiit Savalimmiuniillu ministeriusut pingasut akornanni kisitseriaatsit sorliit tunngaviusimanersut qanorlu nassaarineqarsimanersut paasinissaa amingaatigineqarmat tusaatissatut tiguarput.

Naggataatigullu isumaqarpugut inuiaqatigiittut isiginiartariaqaripput nunatsinni pissutsit pissusissamisuunngitsut aqqinniarlugit inatsisinik allannguisarnerit qanoq iliuuseqarfigissanerigut. Immitsinnut aperisariaqarpugut sooq inuit nunarput qimallugu nuttarnersut? Nassuiaatiginiarneqartartup ilaat tassaasarpog pisortanit ikiorsiissutinik pisartagaqalerniarnermi ikiortissaaleqisarneq peqquasartoq. Demokraatinit erseqqissarusupparput inuiaqatigiittut pingaartitagut pillugit oqallinnermi Inatsisartutut Naalakkersuisutullu pikkorinnerusariaqartugut – minnerunngitsumillu inuiaqatigiit suleqatingalugit aqqiissutissanik pitsaasunik nassaarniartariaqaratta nunatsinniik qimagullutik aallartartut qanoq minnerpaaffianiitilernissaat taamaalillutalu malittarisassat inatsisillu allanngortinneratigut allaffissornerup iluani sipaaruteqarsinnaasunngorluta.

Taamatut oqaaseqarluta Demokraatinit siunnersuut taperserusupparput Inatsisartullu Ilaqutariinnermut Peqqissutsimullu ataatsimiititaliaanut innersuullugu.